


# 西藏調查記

東方文庫第十一種

東商



# 記查調藏西

著合白與沈勤其張

東方雜誌二十  
週年紀念刊物

目 次

西藏宗教源流考

西藏社會調查記

- 一、社會之階級 二、婚姻 三、喪葬 四、醫藥 五、戲術及游嬉並節假日

# 西藏宗教源流考

張其勤著

張君於丙午入藏，三閱寒暑，於藏中之政教歷史，博考周諮，徵要典於檔案，稽異同於番書，所纂輯甚宏富，宗教源流考其一種也。 記者誌

自古未開化之國，必有種種神權以震耀於一世；蓋人民智識未開，迷信遂甚；猶扁舟之入大海，神經錯亂，幾無一定方針；見有人創爲宗教，則炫其神奇，爭先恐後，膜拜不遑；故無論何地，皆有宗教，亦皆有造宗教之人，如謨罕默德之於回教，摩西之於基督教，釋迦牟尼之於佛教皆是。今所急欲研究者，則在佛教；蓋佛教與西藏有密切之關係，外人固欲利用之以施其政策者也。夫西藏之佛教，起點於印度，而

推行於蒙古。當其極盛時代，教權所至之地，即政權所至之地；故至今達賴喇嘛，猶能掌辦商上（按商上譯言公所，凡有重要問題，則由達賴傳集色拉布賚絅，噶勒丹三大寺僧衆及僧俗各番官議決之）。事務，一切政治，仍不出佛教徒勢力範圍之外。今欲謀西藏行政之改良，顧可不於宗教加之意乎？夫佛教事蹟，藏中沙迦吐巴佛所纂經典，記載甚詳。茲取其大意，並參考各籍，以爲言西藏政教者之一助。

先是西方太古時代，有桑結朶佛者，即觀世音菩薩化身，存心濟世；轉生爲帕爾仔巴佛，共轉一千零二次，廣宣經義，救濟衆生。繼此有模巴佛，慈航普渡，所結善緣，難以縷述。嗣後又有淨光王（按淨光王普曜經作淨飯王）古佛，生於西方極樂世界，其眼光化爲帕模卓瑪（卽釋迦牟尼之轉音）佛，憫念羣生苦海無邊之孽，下淚嘆息，心生慈悲。旋有朗娃迦葉長壽古佛，又現身帕模卓瑪佛眼光中，傳授上乘真法。（按周書異記云：『世尊至多子塔前，命摩訶迦葉坐告曰：吾以正法眼藏密付於汝。』又傳燈錄云：『初祖達摩爲二祖慧可易名，以如來正法眼付之。』此

言眼光所化，蓋亦授受之寓言也。俾拯墮入苦海之人，共躋西方極樂之城，慈悲廣大，無岸無邊；隨又化爲千首千眼佛，救解億萬生靈苦惱。從此遞推遞衍，其詳列下：

第一輩 帕模卓瑪佛，即釋迦牟尼佛。

第二輩 朗娃迦葉長壽佛，在甲噶爾釋迦佛誕生之地出世，隨在釋迦佛前出家受戒。（按傳燈錄云，西天第一祖迦葉，釋迦牟尼佛大弟子也。）

第三輩 塞娃，在甲噶爾釋迦佛誕生地方轉世。

第四輩 恰巴王，在甲噶爾沃相地方轉世，遺棄國務，赴薩木丹山頂修鍊。

第五輩 恰擺，係甲噶爾羊八尖王子，與邪教講經鬪法，勝之。

第六輩 拉紀王，係甲噶爾娃熱納斯王子，隨即出家受戒，振興佛教。

第七輩 工却拌王，係甲噶爾南方畢打國王子，親至蓮花祖師傳道處，與諸佛

祖會晤講經，預宣將來西方達賴喇嘛歷輩出世緣由。

第八輩 迭巴鼎布王，係甲噶爾拌噶納地方撒夥王子，特至妖魅之地說法，化其凶性，降服妖王狼噶陣。

第九輩 擺噶王，係甲噶爾南方康打王子，遺棄國務，前赴仙山學經習道。

第十輩 迭巴饒堵丹布，係東方拌葛納王子，毀滅邪教，傳興佛法。

第十一輩 洛墜批，係賈壩王子，鎮壓極惡妖魅。

第十二輩 葛珍，在甲噶爾熱納斯地方某世家轉世，棄家學道，與該國王百姓等傳授佛法。

第十三輩 格捻爭巴，在甲噶爾熱納斯地方某世家轉世，承受大乘法。

第十四輩 擺巴，在甲噶爾東方帳結世家轉世。

第十五輩 達瓦，在甲噶爾曼格達隱逸之家轉世。

第十六輩 仁青宣補，在甲噶爾帳墊地方某世家轉世，傳授大戒。

第十七輩 擺瑪，在甲噶爾帳墊地方轉世。

第十八輩 沃色，在甲噶爾羊巴尖地方轉世，與淨光王佛化身格隆會晤，傳經受戒振興佛法。

第十九輩 滾納降巴，在甲噶爾羊八尖地方某世家轉世，能以佛法化惡戾之人，皆有慈心。

第二十輩 孫格札王，係甲噶爾簪却仲地方王子，年甫一齡，即如七歲之軀，幼年即掌國務，降服妖王。

第二十一輩 迭却王，係甲噶爾奪脚地方王子。

第二十二輩 那夷王，係甲噶爾葉蒙納嶺王子，預言將來轉生西藏，以興佛教。

第二十三輩 根登批，在甲噶爾曼葛達世家轉世，初生即言將我袈裟取來，傳經受戒，自割身肉以飼飢狼。

第二十四輩 頗仁熱雜，在甲噶爾娃熱納斯地方轉世。

第二十五輩 格斯，係甲噶爾娃熱納斯地方王子。

第二十六輩 慧突，在甲噶爾娃熱納斯地方轉世。

第二十七輩 薩巴，在甲噶爾深林中轉世，時赴各處演說因果。

第二十八輩 吉沃，在麻納地方轉世，修建妙靈寺廟。

第二十九輩 帳色仁青，在甲噶爾地方轉世，已雖貴體，然遇極賤生靈，皆視爲平等。

第三十輩 薩木丹桑布，在甲噶爾地方轉世，以德報怨，常存慈悲之心。

第三十一輩 度杼捻攬，在甲噶爾斯娃猜地方轉世，纂集修鍊之法。

第三十二輩 嵴昌王，係甲噶爾嶺昌王子。

第三十三輩 索隆滾都，轉生甲噶爾某巨商家爲禽，某商外出，此禽導引諸生，廣行善事。（按相傳索隆滾都與邪教鬪不勝，被邪教將其靈魂咒移禽體，後經高僧超度，始得復轉人身。）

第三十四輩 賈盡王，係甲噶爾迭蟄王子，該處有象落井而死，日久穢氣四溢，

觸動神怒，降罰瘟疫，用佛法祓除其厄。

第三十五輩 租納正王，係甲噶爾東方拌葛納撒夥王子，與蓮花祖師化身薩迦佛會晤講經。

第三十六輩 格娃擺王，係甲噶爾撒夥爾王子，預示觀世音菩薩並衆多佛祖當往西藏降生，以興黃教。

第三十七輩 爛直簪布，係甲噶爾霞巴王子，由印度甲噶爾遷居西藏簪湯棍地方，隨有材能士十二人，迎立爲藏王，是爲佛教入藏之始。

第三十八輩 依學勒，係西藏王子，初製耕具，並修理溝洫橋梁，以利民用。

第三十九輩 德杼朗頃，係西藏王子，繼立爲王，能承祖父之業，番民愛戴。

第四十輩 第結王，係西藏王子，將凶魅之黑教，盡行驅滅，全藏底定，百姓均獲安平。

第四十一輩 札繩簪，係西藏王子，創造各項器具，並演說佛法，導人爲善，佛教

漸興。

第四十二輩 拉施徒熱，係西藏王子，年至八十歲時，忽由天墮下水晶佛塔，及奪迭桑布經邦工恰甲經，並聞空中語云，此項經義，俟五輩時自有人知其詳細，於是西藏始傳佛經。

第四十三輩 贊普棄宗弄讚，（按棄宗弄讚藏經中作松簪幹布，衛藏通志作曲結松簪喝木布贊普，係西藏王號，猶單于可汗之類。）係西藏王子，初生時頂上時現有朗娃佛像，及長移居噶勒丹寺汪古熱山，其容貌與廟塑之觀世音菩薩無異，藏中僧俗，隨公同前往山頂坐靜處迎歸，立爲藏王，修明政教，地廣兵強，四鄰畏之。於是始遣使通中國貢方物，時唐太宗文武皇帝貞觀八年冬十月也。十五年正月，上表請婚於唐，未許，帥兵二十萬寇唐松州，（按松州即今松潘廳地）與唐侯君集戰，敗績懼，遣使謝罪，復請婚，太宗許以文成公主下嫁，明年贊普遣大論（大論官名即今噶布倫也）祿東贊獻黃金珍寶爲聘；太宗命江夏王道宗持節送之。公

主至藏，惡國人皆以赭塗面，贊普爲之革其俗。爲公主建伊克招廟，供唐所賜之釋迦牟尼於其中，卽今所謂大招是也；又有小招者，贊普爲先娶之巴勒布國王女建，卽供王女帶來之墨居多爾濟佛，當時呼爲巴漢招廟。（按小招或謂亦係唐公主建，公主悲思中國，故東向其門。）贊普旣通中國，慕中國文教之盛，遣子弟入國學，讀詩書；並飭大臣吐密前赴甲噶爾採取經文，以造番字；又手自編定刑律，親督熱松貢布諸佛祖，創建布達拉，頗絅卡頓及楊頓足洛各廟宇。（按衛藏通志云：唐公主同巴勒布王女因藏王座靜，恐有外侮，遂修布達拉官寨城垣上掛刀槍以嚴防禦，後因藏王莽松作亂，毀於兵。）是時贊普之地，東接涼松茂崔等州，南鄰天竺，西併龜茲疏勒等四鎮，北抵突厥，地方萬餘里，勝兵數十萬，西藏之疆，於斯爲極。後贊普及二妃同日化去，今大招中猶塑有遺像。

第四十四輩 度松麻吉，係西藏王子，派人前赴內地，採辦茶葉瓷器等物，並定立規則。

第四十五輩 恥松迭簪，係西藏王子，建桑葉寺，並附近小廟三十餘座，選派聰穎子弟肄習甲噶爾語言文字，由甲噶爾迎請大堪布多人，繙譯經卷，每年度喇嘛極多，此爲紅教最盛時代。

第四十六輩 倘達直熱，係西藏王子，從甲噶爾地方，迎請繙譯洛藏娃（按洛藏娃藏中繙譯之官也，今猶有是職。）數人至藏，將前輩所請經卷，核對明確，定喇嘛一名准役番民七戶之例，創修沃相地方廟宇。

第四十七輩 卡青娃零，在卡曲地方轉世，新纂禪經多卷；時倘達直熱子持蘇隴德燦嗣爲王，卽贊普棄宗弄讚元孫也；迎娶唐肅宗女金城公主；延中印度堪布博迪薩都及巴特瑪至藏，廣建法輪，制伏妖魅，創修巴瑪哈噶拉等處大寺；選土伯特童子，學習印度語言文字，繙譯各祕咒。

第四十八輩 班柱即仲登甲娃，在堆嚙地方轉世，創建咚徵寺院。  
第四十九輩 掌教滾噶宜補，在薩迦地方轉世，新纂薩迦佛源流。

第五十輩 宇札巴，在擦竹地方轉世，建修貢湯寺院，規定管束僧衆條例。

第五十一輩 揚宜沃色，在洛札丹許地方轉世。

第五十二輩 谷茹曲注，在納牙地方轉世。

第五十三輩 汪布簪迭，在洛敏湯地方轉世，講經傳教，信從頗衆。

第五十四輩 汪布迭簪，在昂熱地方轉世，元太祖蒙古青吉斯汗致書遙申皈禮。

第五十五輩 帕巴洛墜堅參，（元史釋老傳作八思巴，蒙古源流考作帕克巴刺密特。）在薩迦地方出世，元世祖蒙古忽必烈汗迎至京師，封爲帝師大寶法王，頒給印信白塔，令領康藏等處地方，

第五十六輩 卓棍桑結，在康湯許地方轉世，創修類烏齊寺院。

第五十七輩 牙桑巴，在簪湯地方轉世。

第五十八輩 松登夷喜，在聶木地方轉世。

第五十九輩 拉紀格娃，在降里地方轉世。

第六十輩 白瑪白讚，在陽布地方轉世。

第六十一輩 薩迦洛墜，在薩迦地方轉世，爲薩迦掌教。

第六十二輩 霞陸仁青齊饒，在霞陸古相地方轉世。

以上爲佛氏設教之緣起，然皆紅教，非黃教也。

黃教創自宗喀巴，宗喀巴者，西甯人也，一名羅卜藏札克巴，生於明永樂十五年，得道西藏之噶勒丹寺，成化十四年示寂。初明太祖以西番地曠人悍，欲殺其勢而分其力，故元代法王國師後人來朝貢者，輒因其故俗許世襲。永樂初，成祖則兼崇其教，聞西僧哈立麻有道術，遣使迎至京師，爲高帝后薦福，封大寶法王西天大善自在佛，其徒三人，皆封國師，其後又封大乘、大慈二法王，禮之亞於大寶；於是其徒爭來朝貢，輶輶京師，所封有闡化、闡教、輔教、護教、贊善五王，又授西天佛子者二灌頂大國師者九，灌頂國師者十有八。法王等死，其徒輒自相承襲，歲一朝貢，略與土

司等所衣袈裟皆紅色，本印度舊式也。其後紅教專持密咒，流弊至以吞刀吐火炫俗，無異師巫，盡失戒定慧宗旨。（楞嚴經云：『攝心爲戒，因戒生定，因定發慧。』）又按傳燈錄云：『無憶名戒，無念名定，無妄名慧。』宗喀巴初習紅教，旣深觀時數，當改立教，卽會衆黃其衣冠，遺囑二大弟子，世以呼畢勒罕轉生，演大乘教。呼畢勒罕者，華言化身也。二弟子一曰達賴喇嘛，一曰班禪喇嘛，喇嘛者華言無上也。皆死而不失其真，自知所往生，其弟子輒迎而立之，常在輪回，本性不昧，故達賴、班禪，易世互相爲師。其教皆重見性度生，斥聲聞小乘及幻術下乘。當明中葉，已遠出紅教上，未嘗受封於中國，中國亦莫之詳也。自我朝興東土，達賴、班禪各遣使，繞塞外數萬里，以崇德七年抵盛京，奉表貢方物，並獻卦驗，知必當一統。自此朝貢不絕，世受封號；而青海顧實汗者，是時亦以兵力盡逐紅帽花帽諸法王，以藏地分居達賴、班禪。於是黃教徧兩藏，而紅教益微矣。

達賴喇嘛第一輩，根登珠巴，卽羅倫嘉穆錯，於辛未年在後藏霞堆地方出世；

十五歲時，拉蕩大堪布札巴喜饒，傳授小戒；二十歲時，傳授大戒；親至前藏，經宗喀巴佛收爲大弟子，授以班墊神母各經；尋回後藏，創修札什倫布大寺；年八十四歲，在札什倫布圓寂。

**第二輩** 根登嘉穆錯，在後藏札朗地方轉世；初生卽能誦卓瑪佛經；十一歲，由班禪隆熱嘉穆錯傳授小戒，二十歲，由捻宜曲濟喇嘛傳授大戒；親纂宗喀巴佛及佛母讚頌；按照經典，修建瓊科爾結新開拉莫神海在布達拉色拉札什倫布各大寺，登講經之座；親至前藏，攢集大招；年六十七歲，在布賚絅幹墊頗章寺內圓寂。

**第三輩** 銷朗嘉穆錯，在前藏堆嚙地方轉世；初生卽朗誦『俺嘛呢擺密吽』六字心咒，能識前輩所用之人；由仁青四朗札巴喇嘛傳授小戒，由噶勒丹池巴格勒擺桑傳授大戒；登布賚絅色拉各寺講經之座。初明武宗聞西藏有活佛，遣中使劉允以兵往迎，至是出鑪關，番人阻之不聽；前將士欲威以兵，爲所敗，遁還。（通鑑載劉允自成都行兩月至其地。查由成都至前藏，約需三月餘程，決非兩月能至；蓋劉